

Persyarikatan Malaysia rapatkan jurang: PM

BH 25 JUL 2000

Oleh Kadir Dikoh, Saidon Idris dan Magendran Rajagopal

KUALA LUMPUR, Isnin - Datuk Seri Dr Mahathir Mohamad berkata, konsep Persyarikatan Malaysia berjaya mengurangkan perbezaan di antara Bumiputera dan bukan Bumiputera, selain membantu menangani krisis kewangan baru-baru ini.

Bagaimanapun, Perdana Menteri berkata masih ramai yang menyalah tafsir konsep itu, termasuk mendakwa konon ia terdedah kepada rasuah, amalan kronisme, hanya menguntungkan swasta dan

menyekat kemajuan kerana kerenah birokrasi.

Katanya, walaupun konsep yang diperkenalkan pada 1983 itu mungkin membawa kepada rasuah dan kronisme, pendekatan konfrontasi terhadap hubungan kerajaan dan sektor swasta juga boleh membawa kepada keadaan serupa.

“Apabila orang mempunyai nilai yang tidak baik, sebarang sistem akan membawa kepada penyalahgunaan. Menyalahkan sistem itu tidak membantu me-

Konsep itu juga berjaya membantu menangani krisis kewangan baru-baru ini.

nyelesaikan masalah.

“Adalah lebih baik untuk cuba menangani penyalahgunaan itu daripada menolak atau mengutuk sistem yang boleh membuahkan hasil yang baik,” katanya merasmikan Sidang Kemuncak Persyarikatan Malaysia 2000, di sini hari ini.

Dr Mahathir berkata, Malaysia membuat keputusan menerima pakai konsep Persyarikatan Malaysia dengan mencontohi Persyarikatan Jepun, walaupun konsep itu dikritik hebat sebagai tidak elok, tidak berprinsip dan dianggap amalan yang tidak baik dan dikeji.

Malah, katanya, dasar Persyarikatan Malaysia membolehkan perkhidmatan kerajaan yang didominasi bangsa Melayu dan sektor swasta yang dikuasai Cina, tidak memperbesar-besarkan perbezaan kaum.

“Dengan konsep Persyarikatan Malaysia, birokrat kerajaan lebih bersedia untuk bersabar dengan ahli perniagaan Bumiputera yang masalah mereka biasanya lebih banyak dan membebankan, berbanding kalangan bukan

Bumiputera.

“Hubungan kerja mereka yang rapat bukan saja menyumbang ke arah memudahkan perniagaan dan mengurangkan prosedur birokratik, malah juga memastikan pertumbuhan baik ekonomi Malaysia serta menggalakkan keharmonian kaum yang lebih baik,” katanya.

Perdana Menteri berkata, kakitangan kerajaan dan sektor swasta bukan lagi asing di

LIHAT MUKA 2

Kejayaan swasta untungkan sektor awam

DARI MUKA 1

antara satu sama lain dan acara tahunan, seperti Kejohanan Golf Persyarikatan Malaysia membantu mengeratkan hubungan antara kedua-dua sektor serta dua kaum utama di negara ini.

Katanya, konsep Persyarikatan Malaysia memang mengambil masa untuk difahami, diterima dan diamalkan sebelum membuahkan hasil, tetapi menjelang 1986, ekonomi mula semakin baik.

"Mulai daripada itu, ia terus tumbuh pada lebih tujuh peratus setahun dan

ia sepatutnya terus tumbuh jika serangan terhadap ringgit tidak berlaku yang menjadi punca kepada kegawatan kewangan dan ekonomi.

"Kegawatan ekonomi yang disebabkan oleh penurunan nilai ringgit menguji konsep Persyarikatan Malaysia ke tahap maksimum. Jika hubungan antara sektor swasta dan awam teruk, Malaysia tidak akan dapat bertahan dengan tekanan yang berpunca daripada kemerosotan tiba-tiba ekonomi negara," katanya.

Dr Mahathir berkata, walaupun pendapatan kakitangan awam tidak begitu terjejas, kuasa membeli mereka berkurangan dengan melambungannya harga barangan dan keperluan utama disebabkan penurunan nilai ringgit.

Katanya, adalah mudah bagi mereka untuk menyalahkan masyarakat peniaga kerana kenaikan harga itu dan taraf hidup mereka yang lebih rendah.

"Tetapi tidak berlaku permusuhan yang ditujukan terhadap masyarakat

peniaga oleh kakitangan kerajaan. Di negara lain, rusuhan kaum akan berlaku dan masyarakat peniaga biasa yang terdiri sebahagian besarnya daripada kaum berlainan, diserang berulang kali," katanya.

Beliau berkata, kerajaan yang terdiri daripada kakitangan awam dan anggota yang dilantik, bekerja keras untuk memulihkan ekonomi ketika kegawatan dengan membantu sektor swasta untuk mendapatkan keuntungan maksimum.

Katanya, kakitangan awam dan anggota dilantik tahu bahawa golongan utama yang mendapat manfaat pada awalnya ialah sektor swasta, tetapi mereka nampaknya sedar bahawa nasib mereka sendiri bergantung kepada kejayaan sektor swasta.

Beliau berkata, kerajaan secara pilihan adalah mesra perniagaan dan pada masa yang sama tidak semata-mata pemurah kerana ia mendapat keuntungan yang baik daripada sikap mesra perniagaan.